

**Kalaallit Nunaanni sakkutuunngorusuttunik (sakkutuunngorniartussaataitanermut misilitsinnerit) katersisarneq ingerlanneqaqqittalernissaa siunertaralugu Naalakkersuisut Rigsmyndighed attaviginissaat pillugu Inatsisartut aalajangernissaannut siunnersuut**  
(Inatsisartunut Ilaasorta, Anna Wangenheim, Demokraatit)

### **Akissuteqaat**

(Nunanut Allanut, Inuussutissarsiornermut Niuernermullu Naalakkersuisoq)

### **Siullermeerneqarnera**

Naalakkersuisut siunnersuuteqartoq Anna Wangenheim, Demokraatit, *Kalaallit Nunaanni sakkutuunngorusuttunik (sakkutuunngorniartussaataitanermut misilitsinnerit) katersisarneq ingerlanneqaqqittalernissaa siunertaralugu Naalakkersuisut Rigsmyndighed attaviginissaat pillugu Inatsisartut aalajangernissaannut siunnersuuteqarneranut* qujapput.

Issittumi piginnaasat annertusarnissaannut siunertalimmik Naalakkersuisut tunngaviusumik maajip 10-ani 2022 isumaqatigiissummik atsiugaqarput. Ilaatigut isumaqatigiissutigineqarpoq nunatsinni ilinniartitaanermik nutaamik aallartitsisoqassasoq Illersornissaqarfimmi Issittumi Tunngaviusumik Ilinniarfimmik taaneqartumik. Ilinniartitaanerup siunertaraa nunatsinni innuttaasut upalungaarsimanermi suliaassanik suliaqarsinnaanermut tunngaviusumik ilinniagaqarsinnaanissaat, tassuunakkullu Illersornissaqarfimmi, Upalungaarsimanermi Pisortaqarfimmi nunatsinniluunniit upalungaarsimanermut ingerlaqqiffiusumik ilinnialersinnaanermut ammaassiviusumik.

Naalakkersuisut, nunatsinni upalungaarsimanermik oqartussaasut, nunatsinni Politiit Illersornissaqarfik Illersornissamillu Ministeriaqarfik suleqatigiillutik ilinniartitaanermik pilersarusiorput. Ilinniartut siulliit 2024-mi aallartissinnaanissaat sulissutigineqarpoq. Kangerlussuarmi sanaartukkat ilaasa najugaqarfiusinnaangornissaannut atuartitsiviusinnaalernissaannullu piareersaasoqartariaqarnera pequtaavoq.

Tassunga suliamut tapiliullugu Illersornissamut ministerimut allagaqarpunga nunatsinni sakkutuujusinnaanermut misilitsinnerit aallarteqqinneqarsinnaangortut. Naalakkersuisut siunertaraat nunatsinni innuttaasut ataasiakkaat namminneerlutik aalajangissagaat sakkutuujusussaataitanermi ingerlatsinissaq Danmarkimi imaluunniit Kangerlussuarmi Illersornissaqarfiup Issittumi upalungaarsimanermi ilinniarfianni ingerlakkusunnerlugu.

Naalakkersuisuniit naalagaaffimmi oqartussaasut misilitsinissaq siunertaqarluni angalaleqqinnissaq aallarteqqissinnaangortoq pillugu saaffigineqareermata taamaattumik Naalakkersuisunit Inatsisartunut innersuussutigaarput siunnersuut itigartitsissutigineqassasoq.